

# SIXTVS PAPA V.

Dilecto Filio Cæsari Baronio Sorano Presbytero  
Congregationis Oratorij nuncupatæ.



**D**ILECTE Fili Salutem, & Apostolicam benedictionem. Cum dilectus filius noster Antonius fr. S. Ioannis, & Pauli Presbyter Cardinalis Carafa nuncupatus Bibliothecarius Apostolicus nobis retulerit, a te primum Annalium Ecclesiasticorum volumen editum, aliaq. propediem edenda esse, opus non minus docte, quàm fideliter a te scriptum, & ad totius antiquitatis Ecclesiasticæ notitiam comparandam valde utile: quibus nimirum non tantum res gestæ exacte per annos singulos recensentur, & quæ de his obortæ sunt controuersia elucidantur: sed etiam ipsi Apostolicarum Traditionum fontes purissimi aperiuntur, atque hæreticorum mendacia confutantur: Nos qui eruditorum omnium fouere solemus ingenia: cum tuam in primis industriam, & egregiam pro Catholica Ecclesia nauatam operam magnopere in Domino commendemus: Cupientes ut idem a te editi, **VEL EDENDI ANNALES ECCLESIASTICI** ad integram rerum veritatem custodiendam seruentur penitus incorrupti, & quàm diligentissime fieri potest typis excudantur: ac demum ne a quoquam seu negligentia, seu malitia mendis deformari, aut aliter etiam forsân titulo mutato vel forma, mutari, corrumpi, vel deprauari possint: Motu proprio, & certa nostra scientia omnibus, & singulis Christi fidelibus, præsertim librorum Impressoribus, ac bibliopolis, quouis nomine nuncupatis, tam in Vrbe, & illius districtu, ac statu, & ditone temporali nobis & S. R. E. mediate, vel immediate subiecta, sub quingentorum ducatorum auri Camera Apostolicæ eo ipso applicandorum, necnon amissionis librorum atque typorum: quàm etiam per totam Italiam, & extra eam vbiuis gentium, & locorum constitutis sub Excommunicationis maioris late sententiæ pœnis eo ipso absque alia declaratione incurrendis: Auctoritate Apostolica, tenore præsentium interdiciamus & inhibemus, ne per decem annos a data præsentium computandos, primum Tomum Annalium a te editum, **ET ALIOS SINGVLOS A TE EDENDOS**, totidem annorum spatio ab vniuscuiusque eorum editione numerando, absque tua licentia imprimere, aliove titulo, vel forma, quouis prætextu mutatos, vel alio quocumque idiomate versos edere, vel sic editos vendere, seu venales tenere audeant, vel præsumant. Mandantes vniuersis, & singulis venerabilibus fratribus nostris Patriarchis, Archiepiscopis, & alijs locorum ordinarijs, eorumq. Vicarijs, seu officialibus in spiritualibus, generalibus, ac in dicto nostro statu Ecclesiastico Legatis, Vicelegatis, Gubernatoribus, Potestatibus, & alijs Officialibus: ut quando, & quoties per te vel tuo nomine fuerint requisiti, præmissa contra inobedientes exequantur, & obseruari faciant, inuocato ad hoc, si opus fuerit, auxilio brachij sæcularis. Non obstantibus constitutionibus, & ordinationibus Apostolicis, ac statutis, & consuetudinibus, iuramento, confirmatione Apostolica, vel quavis firmitate alia roboratis, priuilegijs quoque, indultis, & litteris Apostolicis quibusuis personis quomodolibet concessis, & confirmatis. Quibus omnibus, illorum tenores, ac si ad verbum insererentur præsentibus, pro sufficienter expressis habentes, hac vice dumtaxat specialiter, & expresse derogamus, cæterisq. contrarijs quibuscumque. Volumus autem ut præsentium litterarum exemplis etiam in ipsis voluminibus impressis eadem vbiq. fides habeatur, quæ ipsis præsentibus haberetur, si forent exhibitæ, vel ostensæ. Datum Romæ apud sanctum Marcum sub annulo Piscatoris Die xxvj. Iunij, **M. D. LXXXVIII.** Pontificatus nostri Anno Quarto.

Tho. Thom. Gualterutius.





CAESARI BARONIO SORANO  
VIRO OPTIMO, DOCTISSIMO,  
AMICISSIMO

Consalvus Ponce de Leon Hispalensis.



**Q**uid potuit madidum sacro sanguine ferrum,  
Tela, ferae, flammae, spicula, saxa, cruces?  
Obruta quid tenebris, mutisq; oppressa sepulchris,  
Invidia Gentis, NOMINIS acta pij?  
Ecce renascuntur tempus victura perenne,  
Qua surgit lucis, qua requiescit honos.  
Caesaris id praestat calamus, praestantior ense  
Caesaris: hic vitam sustulit, ille dedit.



Tertius Annalium Tomus incipit ab Imperio  
Constantini Magni, perduciturq. vsque ad  
Constantij eius filij obitum: complectitur  
annos quinquaginta quinque, sextum ex  
parte tantum attingit.



A N.